

6-9
2

北江先生文集

門人吳兆璜
敬署

北江文卷第六

南師範
學院圖書

桐城吳闓生

峯記

起民國五年丙辰訖八年己未凡四年得文四十三首

古文辭類纂評點序

丙辰

姚姬傳先生古文辭類纂集千古文章之大成先大夫嘗謂當與六經並傳不朽其它猥雜無用之書皆可燒也蓋中國典籍繁重千別萬彙學者靡所適從西學起爲學日力旣奪減太半益無假研求往時紛糾不急之書惟文字者古人精神所寄託得其精神而後其餘乃可以條而理也是故文章實爲問學之原自經史諸子以及百家之著述探微索莫一以貫之者唯此而已雖然精神之微眇固非盡人所與知夫惟豪傑獨立之士不囿於謏聞不牽於目論孤懷眇慮曲構旁通逮其功力漸積之久乃得與古人肝

嚮於儵忽之間而感發於意言之表於是衆人聽睹所不及思心

所不至者灼然粲然若燭照數計而決別其白黑徐又錚云辛苦語非恆人所能道此

道要之指歸能事之極詣非可以執塗人而共喻之者也昔輪扁

譏齊桓公謂公所讀書皆古人之糟魄其不可傳者死矣夫書雖

信爲糟魄而所不可傳者未嘗不寓乎其中古之人固未死也彼

特詭詞以寄痛耳悲夫世之淺者不知古人之不可傳者何在而

惟沈溺於糟魄之中至老死而不寤則不朽之精神幾何不相汨

以俱盡也豈不哀哉徐云沈鬱頓挫古之爲學者有微言有大義徐云接筆秀挺傳曰

孔子没而微言絕七十子分而大義乖大義炳於日星必待微言

而後發微言不明則大義亦旁皇而莫定蓋聖人之學如此禮墜

樂崩聖人之微言吾不得而知之矣士生三代後而欲求古人精

微之所寄舍文章之學其誰與歸芒乎芴乎上窮千古後暨萬年

必無以易姚氏此書者此可斷而知也是書姚氏故有評隲點識
學者傳寶之刻本或載或否而自來遂錄者又有方劉二家評點
先大夫生平自讀之書經子史以下及各家專集詩文凡數百種
皆有評點而於此書尤兢兢既精選而平定之又彙錄歸方以來
諸家及梅伯言曾文正公張廉卿先生之說時取而參校之蓋姚
氏此書既集文學之大成而先君又集諸家評說而爲折中焉塗
轍昭然譬之於西學一科具矣徐云隨手收拾應前完密學者循其塗而進焉則
嚮者精神肝鬲之說也蕭縣徐又錚中將篤志好學取類纂評點
躬自校錄數十萬言逾月而竣既深自得復印而傳之以餉同好
其表章微學勤矣或謂評點之體疑若近陋者妄也陋不陋在學
識高下不在外著之迹學識至矣點竄經傳以示來茲皆可法式
如其未也卽緘默不發庸詎免於陋乎惟前賢之所究極者既皆

精神微眇之事持以褫諸聲利競逐之場吾恐其孰視若無睹也然則又錚作育之盛意亦且虛懸於旁薄無厓之域而猶爲有待也夫

徐又錚云有眞辛苦故能說著眞關節有大懷抱故能發出大感慨至行文之決淋漓正所謂取懷而予也王古愚云精義入神非大澈大悟者不能道其隻字

聯文直公行狀

公諱聯元字仙蘅姓崔佳氏滿洲人先世居奉天鐵嶺清初從入關占籍直隸寶坻遂爲寶坻人曾祖以下皆以公官貴封中憲大夫妣皆封恭人公性嚴正家貧日纔供一餐課學徒自給同治戊辰成進士改翰林院庶吉士散館授檢討歷充功臣館纂修文淵閣校理國史館纂修光緒壬午以京察記名安徽遺缺知府授太平府知府大吏材公爲調署安慶是時兵革初定歲數饑民不聊生鞅罔者輒因緣爲姦利吏因循坐視不一何問公曰此亂徵也我不可不矯厲之故所至一以廉謹自持於民生利病所宜興革

無不爲事有不可未嘗詘己以徇流俗利害禍福弗顧也建德令
暴征民乞減不許遂以叛告大府不察遣兵往勦公力持之乃罷
曾公國荃爲江督偉公治績奏補安慶公在安慶久築隄興學保
甲拯災多可紀者皖人立石頌之以卓異徵還攝安廬滁和道未
幾除廣東惠潮嘉道潮故濱海與諸外國互市諸國多設領事官
莅治姦民結黨冒外籍行不法公嚴禁遏絕有李奉愛者稱英籍
酣博尤甚公怒繫之英領爭不能得則電使臣要脅總署公執益
堅朝廷憚公嚴乃移擢公爲安徽按察使公喟歎曰直在我而媚
鄰以自詘非外交義也國其益替矣疏請入朝陳狀天子嘉之詔
以三品京堂在總署行走庚子補太常寺卿擢內閣學士兼禮部
侍郎銜總署行走如故公痛國勢不振列強益內侮而朝野上下
又營不察彼已謂夷狄可擯中國可坐強大張脈僨興日以驕妄

賈禍既不可奈何乃益自策厲與同時賢僞講求歐西治強之術
謀濟變圖存之道思有以效於當世志未及伸而拳匪之亂作矣
初景皇帝既親政孝欽皇后罷臨朝而持國秉如故僉王附結蠱
政黷貨國勢岌岌中日之役國兵連衄帝憤甚銳意變法引用少
年新進之士舊黨大慝太后再出誅譚嗣同林旭等六人謀廢帝
賴歐美使臣諷止以故不能發而恨外國滋甚自西教入中國深
惡民多倚教自恣虐良民民積忿久乃相率習拳技假神道爲報
復以尊王攘夷爲號所在並起朝貴聞之大喜愆太后召其渠入
都議撫用之欲藉民氣恫喝外國於是匪勢大張各省蠶午響應
燒教堂劫殺外國教士紛紜不可止既入都益橫甚千百爲羣游
行街市皆露刃紅巾猖狂叫譟計攻破使館盡撲殺外國人晝夜
洶洶各國聯軍至大沽謀入衛責言曰亟太后召廷臣決和戰時

端王載漪用事載瀾載功輩佐之主戰甚力羣臣震懼莫敢言獨袁昶許景澄二人持不可公亦言曰國軍禦一日本尙不敵況以烏合抗列強乎且自古未聞以邪術成大事者其不可用無待再計決也立山徐用儀並助公言爭不決帝命公與用儀立山赴使館媾和袁昶許景澄相繼往議已復命載漪怒曰此皆漢姦也不急殺無以肅天下帝執景澄手而泣載漪誣景澄攬上衣不敬公亟辨解之太后不答公見事急復與四人合詞請遣諸使出境太后不許固諫乃限一日至天津諸使慮中途有變不敢出無何聯軍陷天津至通州國人莫能阻載漪等不請於上矯詔執袁昶許景澄殺之旋又縛公與用儀立山駢戮於市庚子七月十七日也年六十三公死三日京師陷兩宮出走外國兵橫行都門國之亡者如綫矣及和議定公與袁許等皆詔復原官錄子椿壽官主

事旋詔史館立傳諡文直許建祠祀嗚呼拳匪之亂其荒誕兒戲殆無人理可言不待兒童之見可以闢其誣也乃舉朝卿相至於中外百官相率崇禮尊奉無敢頌言破其姦者至肇涓天之禍覆宗祏傾國家而不悟豈非天不祚清促之亡而奪其鑑哉當是時能昌言利害以阻狂昏之燄者獨袁許二公與公等五人耳然皆蹈奇禍碎身首而不救亦可哀矣禍之將作也稔惡極而正言讜論之力固不足以抗之自非忠烈出於性生不顧死生禍福者誰敢犯必死之難一決別其是以非哉雖均之于事無挽回之效而空糜其頂踵以繼之然徇義之君子固將甘之而不辭此可謂忠矣嗟乎事已至是則人理之所以不絕者僅在此一二冒死不顧之人耳其爲效反不鉅邪此公之死而舉國之人皆爲之哀傷悼惜而不已者也公爲人絕華靡事親孝與人交久而不渝主程朱

之學以躬行實踐爲歸官事雖劇不廢讀書嘗曰士夫平時恐懼
修省臨難庶有以濟蓋其素蘊然也配王氏封夫人子椿壽隆壽
女二適翰林編修壽富壽蕃俱殉拳匪之難謹狀

劉際唐云敘次
得法論亦酣恣

寧阿蘭鎮守使徐君墓誌銘

君諱世揚字聲甫天津徐氏弢齋相國從弟也生數月而孤太夫
人撫以立嘗從諸父德安君官所能以才略自見德安君卒君挈
諸弟徒步千餘里扶柩歸鄉葬旣葬顧天下多事歎曰丈夫生
當爲國以武烈自效終不能嘿嘿老筆研閒矣是時相國方以侍
郎督練兵事卽遣入陸軍學校學成而相國總督東三省君亦從
往遼東密邇強鄰形勢撓曲相國壹意兵備君喜得其會奔走疏
附其閒初叔憲兵學堂復隸兵備處以母病還省唐公紹儀使外
國請君爲佐君以母故辭太夫人怒曰吾以遠到期汝今不行是

我尼汝也趣使行從唐公厯聘日本英法德美諸國飽聞飫見半載而歸歸復供職東省凡居東且十年厯三省兵備處提調吉林教練處幫辦陸軍調查局會辦陸軍小學堂總辦遂爲四十六旅旅長改吉林第三混成旅旅長兼任寧阿蘭鎮守使累官陸軍少將佩二等文虎章民國以來東邊稍益多事君內綏外戢寇闕不興軍實以練以地寒不敢奉母就養太夫人病篤告終于家君聞赴痛絕又迫邊事不得葬喪悲哀噎嗝五年九月卒年四十幾葬於輝縣某所之原配某氏子緒卓緒量夫出而從公入而將母此生人之大任也而其事往往不能兩全君早負奇氣思奮武績以太夫人故幾阻壯志迫於嚴訓不敢自墮積伐累勤聲聞焯著矣乃卒以滅性之毀茹鬱而殂其於事親旣若不能無憾而報國之事業亦未克以終豈不哀哉雖然盡瘁於國卽所以報其親太夫

人有知當憲所期爲不負也斯亦子民之極則也已闔生見知相國相國以狀屬銘銘曰

起視三軍龍騰虎嘯入奉慈親愉愉色笑笑言未已叱咤風雲豈伊我志母訓是敦志則遠矣逝不返矣畢命從親亦何憾矣不有吾親孰爲邦國曷孝曷忠茲焉維則

李右周云質健深醇銘亦轉變不測

東浦陳氏譜序

代黎總統

陳君燮樞持其家譜來請序譜牒於宋咸淳間翰林學士燾之伯昭陳氏系出虞舜自胡公滿以下三十世爲成安君餘又八世爲太邱長寔五十四世至霸先受梁禪有天下陳亡宜都王叔明子希烈入隋爲會稽司馬至七十世堯叟堯佐當宋仁宗朝兄弟以甲科爲宰相貴盛一時七十九世爲熹之熹之曾孫亮工當南宋之亡遷居東浦躬耕不仕是爲燮樞始祖自虞氏以來世系蟬儔

至今無斷續不可譜者宅家所弗逮也傳稱舜德以爲必百世祀
諒哉夫吾國自古以宗法維天下輓季稍稍衰落矣而士大夫之
於譜乘多能世守弗失雖或牽託難稽而由來已久蓋氏族之學
所以別種姓也然其析之而愈殽者亦往往合之而愈廣陳出於
虞著矣今考歐公宰相表其所載九十八族而出於嬀姓者尙有
六焉如袁氏胡公滿後有伯爰至孫濤塗以王父字爲氏後改爲
袁則袁固舜後也陸氏齊宣王少子通封於陸終因以氏焉則陸
亦舜後也敬氏敬仲子孫以諡爲氏是敬亦舜後也第五氏漢初
諸田徙守園陵以第次爲氏是第五亦舜後也至於姚爲嬀之自
出田與陳爲一宗又衆著無待言矣而陳氏之譜載齊王建諸子
威別姓王氏爲北海陳留諸王之祖歐史亦云是陳之與王亦宗
也夫姚田陳王袁陸敬第五諸族今日視之各不相蒙烏知其始

固同一源者乎且黃帝二十五子十四姓分列天下枝條雲布以至於今誰非義皞軒農之子孫也又何派別之可言乎世之君子本其敬宗收族之義以推而遠之合九州百族皆有家人一體之誼焉是則國之厚幸也已

王節母碑

節母姓王氏夫曰某未嫁而考妣皆逝旣歸而夫又卒服勤三十餘年同治某年月日奄終年六十餘節母性嗜學旣寡無所發乃一刻其子生八歲卽趣使學後益寔棄儒而賈然節母嗜學故不改古書舊冊重值羅購纍纍屈架上咸豐中寇擾汜水倉卒去及還所庋書燒炳焚杆以盡零縑殘簡狼藉滿地節母大悲恨流涕絜歛雖貧賁奇賄弗逮也及孫某卒以劬學通籍出宰畿甸歷宛平涿等州縣同知南路西路廳擢順天府治中震著能聲光大門

戶嗚乎不有積也其何以昌繇節母之志推之雖被天下可也況
在其家雖縻百世可也況其孫子乃勒石述行以爲後勸銘曰
懿節母貞所操鏤冥冥汔光曜眷殘冊情芬馥繳射虛抱的歸枿
再葩竟不違於維學用不竭酌注之垓數帑治府中績猶嘽充厥
施光孰掩鬱極申言匪玷誥荒遐垂琬琰

劉際唐云繳射虛
二語奇警獨振

祭黃興文二首

王綱解紐海水橫飛國維不張民安適歸爰有大桀眴眴而起麾
肱詘伸萬衆披靡方其膺臆憤薄高穹瀝血臨江大陸波紅廊廟
堂皇千古結束一旦蕩決解冕脫紱江漢收功金陵坐鎮餐未下
咽又接以刃天不悔禍土宇再騷卷聲遏勢如託而逃今者告寧
萬邦咸喜傾國圖功而君逝矣羣彥酋酋行弔走哭矧在涼德夙
同茵轂軒飛俊氣勃鬱猶生河山礪落不共觀成蓋代之姿忽焉

殄殲來葉茫茫凜茲遺則

右代黎
總統

元化流行治失則戰聞不有人孰持其變清政之隳上下恬靡我
戈一麾百蟄咸起雖云偉績而亦艱哉親蹕坎窞以搏羣豺粵海
滔滔孤颿出沒氛霧四塞鬼伯夜哭毒痛中野砰礮憑江漢濱小
頓迴艖而東艸荆南都總戎是職留守三月創羸未復功成不與
名將之風蕭然解甲弭節江潯跪馬囊弓未肯盡殺譬彼槐木豈
堪屢伐引身遠去天風海濤大名人間斗揭嵩高滇南再舉豪儁
景從旌麾遲出萬首喁喁前勛宜報後績方遐胡天不弔而奪之
邪維我與君角倚相倚左提右挈國庶有豸飄然長往君則何悲
顧維衰劣搢此顛危千艱萬難一埤遺我眄想雄姿不知所可海
天寥廓雪涕陳詞英風毅魄庶鑒于茲

右代段
總理

祭蔡松坡文

代段
總理

王癸以還異軍特起功名立聲光雪煒舉國所推海寓鼎峙屈
指數之四三人耳於中有君尤極天矯冠劍趨朝目營八表滇池
萬里邈絕南交戈鋌邪指士氣如潮踊躍用兵譬虎傳翼眾煦所
漂大山坐失兔脫靈驚出於靜女我見斯人乃信此語偉績既成
曾不中壽天平人乎厥因孰究大難初夷萬端新造詎非僂豪孰
資遠到如君等輩顧叱風雷天關地局震蕩闔開假之魁柄以極
其才功名所就可勝言哉吾徒老矣跂望空羸奈何壯佼不遂其
成甫弱克強又耘吾子譬欲拚飛中折兩翅事變蒼茫人才寥落
起視九州潛焉氣奪

劉際唐云以驅邁之氣運瑰怪之詞於
浮夸之中寓謹嚴之意數首大意略同

黃興蔡鍔合祭文

代馮副
總統

大野騰波龍蛇起陸鈎陳耀芒百靈夜哭爰挺異人奮戈而起天
昏地霾一麾清瀾國本既定毋敢撼搖孰綱維是責在吾傳神勇